

Rinforzar la scolaziun dal persunal en il sectur da la sanadad

Register central da las professiuns

DA LUCAS DEPLAZES / ANR

■ (anr/ld) Sunter il cussegl dals chantuns ha er il cussegl naziunal acceptà ier la nova lescha davart las professiuns en il sectur da la sanadad publica cun 181 vuschs cunter tschintg e trais abstenziuns. In register central duai infurmar ils responsabels per la sanadad publica davart la furmaziun e las cumpetenzas dal persunal e da tgira.

En la debatta d'entrada ha il pledader da la cumissiun, *Jean-François Steiert* (pss/FR), confermà che la cumissiun proponia unanimamain d'entrar en la materia. Tar las professiuns per il sectur da la sanadad publica sa tractia quai d'in interess public. Or quest motiv èsi necessari da reglamentar las cundiziuns da basa per la furmaziun dal persunal (persunal responsabel per la tgira, spendreas, fisioterapia, ergoterapia) sin tut il territori da la Svizra. In register central da quellas professiuns duai lubir daper tut da pudair giuditgar la scolaziun e las cumpetenzas dal persunal da tgira qualitfegà. Ils motivs principals èn ils basegns supplementars ch'il svilup sin il sectur da la tgira pretenda e novas malsognas da noss temp cun ina gronda mobilitad globala. Da resguardar èn plinavant ils fatgs che la gliued vegn pli veglia e che dapli persunas attempadas vulan restar a chasa er en cas da tgira. En vista a quella realitad è necessari dapli persunal (indigen) bain scolà. Diversas posiziuns ha quai dà en la cumissiun davart la scolaziun sin il nivel universitar. Ina minoritad ha admonì da vulair «academisar» il sectur da la sana-



Cusseglial federal Alain Berset ha defendi la pusiziun dal cussegl federal. KEYSTONE

dad e fatg attent a las consequenzas finanzialas. Gist il sectur da tgira dovria persunal cun ina gronda cumpetenza sociala e cun ina extendida experientscha en la pratica.

In register central da las professiuns

En connex cun la nova lescha duai vegnir creà in register central da las professiuns da sanadad, analog al register existent per ils medis, dentists ed apotechers. Quest register duai lubir a las instituziuns da tgira da conuscher pli bain la scolaziun e las cumpetenzas dal persunal en tut ils chantuns e garantir la segirtad e la qualitad dals pazients. Il nov register duai plinavant procurar

per dapli interprofessionalitad e furmar la basa per introducir in dossier dals singuls pazients sin plaun naziunal.

Furmaziun universitara

Ina furmaziun universitara dal persunal da tgira possia distgargiar ils medis e reducir ils custs, han fatg attent divers pledaders. Ina minoritad (pss e verds) propona d'introducir in studi da master per persunal da tgira cun l'accent «Advanced Practice Nurse». Ina tala scolaziun possia augmentar la segirtad e la qualitad dal tractament da tgira. Exponents da la pps e da la pcd han admonì da vulair «academisar» las professiuns da tgira. Tenor il cussegl federal n'existia nagin profil per in studi da bachelor e master. Necessary saja dapli scolaziun e pratica per la tgira. Cun 118 cunter 73 vuschs ha il cussegl naziunal refusà da pretender in studi da master per il persunal da tgira.

Register central

En num da la pps propona *Mauro Tuena* (pps/ZH) da stritgar las disposiziuns d'introducir in register naziunal. Oz existia gia in register chantunal. Cusseglial federal *Alain Berset* ha fatg attent ch'ils chantuns hajan giavischà in register naziunal che garanteschia las datas dals singuls pazients. Cun 121 vuschs cunter 63 ha il cussegl naziunal refusà la proposta Tuena. Plinavant ha il cussegl naziunal refusà ina proposta da promover la furmaziun cun otg milliuns francs. En cas da basegn po il parlament conceder pli tard in tal credit.